

ब्रह्मण॒वैनाः॑ सादयति । अ॒न्तरा॒ होतु॒श्च धि॒ष्णि॒यं ब्रा॒
ह्म॒णाच्छ॒ः॒सिन॑श्च सादयति । आ॒ग्ने॒योवै॑ होता । ऐ॒न्द्रो
ब्रा॒ह्म॒णाच्छ॒ः॒सी । तेज॑सा चै॒वेन्द्रि॑येण चोभयतोरा॒ष्ट्रं
परि॑गृह्णाति । हिर॑ण्ये॒नोत्पु॑नाति । आहु॑त्यै हि प॒वि-
त्रा॒भ्यामु॒त्पु॒नन्ति॒ व्यावृ॑त्यै ॥ १ ॥

श॒तमा॑नं भवति । श॒तायुः॑ पु॒रुषः॑ श॒तेन्द्रि॑यः । आ-
यु॑ष्ये॒वेन्द्रि॑ये प्र॒ति॒तिष्ठ॑ति । अ॒नि॒मृष्ट॑मसीत्याह । अ॒नि-
मृष्टः॑ ह्येतत् । वा॒चो॒बन्धु॑रित्याह । वा॒चो॒ह्येष॑ बन्धुः ।
त॒पो॒जाइ॑त्याह । त॒पो॒जाह्ये॑तत् । सोम॑स्य दा॒त्रम॒सी-
त्याह ॥ २ ॥

सोम॑स्य ह्येतद्दा॒त्रं । शु॒क्रावः॑ शु॒क्र॒णोत्पु॑नामीत्याह ।
शु॒क्राह्या॑पः । शु॒क्रः॑ हिर॑ण्यं । च॒न्द्राश्च॒न्द्रेणे॑त्याह । च॒न्द्रा-
ह्या॑पः । च॒न्द्रः॑ हिर॑ण्यं । अ॒मृता॑अ॒मृते॑नेत्याह । अ॒मृ-
ताह्या॑पः । अ॒मृतः॑ हिर॑ण्यं ॥ ३ ॥

स्वाहा॑ राज॒सूया॑येत्याह । राज॒सूया॑य ह्येता* उत्पु॑ना-
ति । स॒ध॒मादे॑ा द्यु॒म्नि नी॒रुज॑ए॒ताइति॑ वा॒रु॒ण्यर्चा॑ गृह्णा-
ति । व॒रु॒णस॒वमे॒वाव॑रुन्धे । एक॑या गृह्णाति । एक॑धैव
यज॑माने वी॒र्य॑न्दधाति । क्ष॒त्रस्यो॒ल्वम॑सि क्ष॒त्रस्य॑ यो-

* एना इति काशीस्थपुस्तक पाठः ।